

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1657 del 15/06/2025

De materialn verraichern de ausstell “unRècht! Gschicht va sozialeta unrèchtigkaitn” as men kònn pasuachen vinz en merz van 2026

En Volkskunstmuseum va Innsbruck de schual va de bersntoler gamoa’schòft van a vòrt ont va hait

[Mòcheno] Durch an kritischn plick as en lem van a vòrt, de ausstell en Volkskunstmuseum va Innsbruck “unRècht! Gschicht va sozialeta unrèchtigkaitn” as ist toal van Museumjor 2025 va de Euregio, lont inn de lait za tschbinnen drau as an ettlena bitchtega ont prenneta questionen va haitzegento.

As en tema van sprocheninderhaitn ont mear as ònderst as de sprochen as praucht kemmen en de schualn, der paispil as vour steat ist der sèll van bersntolerisch. Lai sait gònz kurza zait ist s inntretn en de schualbèlt, ober en de gschicht de sprochen as dominiart hòt ist nèt òlbe gaben de balsch. Bavai, en de zait zbischn de ’60er jor van XIX jorhundert vinz en Earste Bèltkriag ist innpfiart kemmen – benns aa nèt òlbe gònz guat gòngen ist – de taitsch schual. S toal va de ausstell as en doi tema lòkt schaug drai òrbetn gamòcht va kinder va de schual en Bersntol as kemmen van Archiv van Bersntoler Kulturinstitut va Palai en Bersntol: a heft as taitsch van jarder 1910-11, an ettlena kurza gschichtn pet zoachn as balsch van ’70er jor van vourder jorhundert ont an òrbet as bersntolerisch gamòcht en 2023. Zòmm pet de drai òrbetn hòts an tèkst as paschraip de gamoa’schòft ont de intiziativn as envirtrong kemmen ver za understitzn s bersntolerisch ont an kurz audio as bersntolerisch as paschraip de gamoa’schòft.

De ausstell, as bart offet plaim vinz as de 15 van merz van 2026, lòkt schaug plinder ont zaig va òllto as kemmen van Tirol, van Sudtirol ont van Trentin. Van doi leiste toal hòts sòchen van Kriagmuseum va Rovereto, va de Magnifica Comunità va Fiemme ont van Museum van Hoagarda. Derzua sai’ kemmen parootet vil eventn ont didaktischa bèkn.

Òndra informazionen kònn men [DO](#) krieg.

Ibersetz van Bersntoler Kulturinstitut

(It)